

金石續編

金石續編卷第三

隋

武進陸燿通纂

太倉陸增祥校訂

隋

千佛山造象記七段

摩崖高廣字數不等
正書在山東歷城縣

劉景茂造象

大隋開皇七年歲次丁未正月十五日弟子劉景茂知
身非恒疾踰露草是以敬造 弥勒像一區伏口 皇
帝石勅臣僚百官石勅十世師僧父母見存眷属一切
石衆生共同口福

時皆殘造象

開皇八年五月十五日時皆□□爲□□□□敬造釋
迦像一口□法界衆生

李景崇造象

維大隋開皇十年歲次庚戌八月丙辰朔八日癸亥弟
子李景崇所知身非永固素軀難存機變無留生化有
易是以敬造阿彌陁彌一區并二菩薩上爲皇帝陛
下師僧父母見存眷屬一切衆生咸同斯福

宋去疾造象

開皇十一年五月廿三日宋去疾爲亡父母亡姑敬造
彌勒像一區上爲國王帝主師僧父母見存眷屬咸同
斯福

大像主吳造象

大隋開皇十三年歲次癸丑□三月十三日大像主吳
□□合家眷屬遂割生資敬造阿彌強像乙區願共一
切衆生同登岐□□□□□□保天壽

楊文蓋造象

大隋開皇十三年歲次癸丑九月戊戌朔十二日巳酉
佛弟子楊文蓋領都工人爲亡父母敬造弥勒像一軀
并二菩薩上爲皇帝陛下師僧父母居家眷屬邊地衆
生咸同斯福

女口從等造象

女口從息金政女金膝女毛人開皇十五年正月十二

口造

噯嘛呢巴弥吽

此六字別爲一行
縱橫各二十字

按今濟南府歷城縣南歷山一名千佛山蓋因造
象之多而名也茲就拓本錄之開皇七年至十五
年凡七段訪碑錄有開皇十年吳□十三年宋僧
海妻張公主十五年女花紅等造象記元年□□
十五年□□題名未見拓本不錄其七年鄧景□
乃劉景茂之誤十一年宋去疾十三年吳□□十
五年女□從息金政等記則孫氏所未錄也

以所蓄拓本校之八年造象時下是昔字吳氏
筠清館亦作昔十五年造象政上是君字仁上

是毛字毛三此作皆作金作毛今依原書錄
入仍附志之又案十一年造象宋下二字吳作
去疾原缺今據以補入濟南金石志作叔敬前
跋所稱十三年造象記一刻吳氏載之余亦得
焉吳氏所載尚有十二年安永照一刻並識之

陸增祥志

驃騎將軍鞏賀墓志

石縱廣各一尺八寸三十一行行三十二字正書篆
額題周驃騎將軍鞏賀墓誌九字在陝西武功縣署

周驃騎將軍右光祿大夫雲陽縣開國男鞏君墓誌銘
公諱賓字客卿張掖永平人也自壽丘之山卿雲照三
星之色襄城之野童子爲七聖之師繼詰傳賢鞏終古

而長懋垂陰擢本歷寒暑而流芳曾祖澄西河鼎望行
滿鄉閭後涼召拜中書侍郎建威將軍玉門太守屬涼
王無諱擁戶北遷士女波流生民塗炭乃与燉煌公李
保立義歸誠魏太武皇帝深加礼辟授使持節大鴻臚
散騎常侍高昌張掖二郡太守封永平侯贈涼州刺史
祖幼文西平鎮將孝天慶汝南太守政脩奇績世襲茅
土州閭畏憚豪右敬推家享孝子之名朝捐良臣之譽
門稱通德里号歸仁公惟岳惟神克岐克嶷幼而卓尔
爽慧生知長則風雲英聲自遠永安二年從隴西王尔
朱天光入關任中兵掾軍内決機籌外捻軍要除平東
將軍太中大夫周太祖龕乏關河公則功衆草創沙苑

苦戰勲冠三軍封雲陽縣男邑五百戶大統十七年除岐州陳倉令周二年除敷州中部郡守厯居宰莅民慶來蘇野有三異之祥朝承九里之潤保之二年授司土上士四年遷下大夫濟濟鏘鏘允具瞻之望兢兢塞塞見匪躬之節天和二年授驃騎將軍右光祿大夫四年任豫州長史別駕駿驤躡起千里之清塵鬱鬱鳳林灑三春之懋澤君子仰其風猷小人懲其威化諒人物之指南寔明君之魚水俄以其年十二月邁疾薨於京第春秋五十有五夫人許昌陳氏開府儀同金紫光祿大夫岐州使君西都公豐德之長女也繇翔飛鳳則四世其昌天聚德星則三君顯号清音麗響与金石而錦

錡秀嶺奇峯隨風雲而榮鬱夫人資光稜采稟教嚴閨
淋慎內和容言外皎高門儷德君子好逑保芝元年先
後朝露春秋卅五爲仁難恃天無蠲善之徵樹德遂孤
神闕聰明之鑒倡隨俄頃相繼云已逝者如斯嗚呼何
已公夫人之卽世也時鍾金草齊秦交爭車軌未并主
祭幼沖且隨權塵今世子營州總管司馬武陽男志次
子右勲衛大都督上洪男陞運屬昌朝宦成名立思起
慕義心纏霜露攢風枝而永慟哀二親之不待陟岵岵
而長號痛百身之罔贖乃以今開皇十五年歲次乙卯
十月丙戌朔廿四日己酉奉厝於雍州始平縣孝義鄉
永豐里高岸爲谷愚公啓王屋之山深谷爲陵三州塞

長河之水懼此質遷故以陳諸石鏡銘曰

白帝朱宣寔粵金天西河良將張掖開邊承暉接響世
挺英賢賢哉上喆時之人儼夏雨春風松心竹節肅等
霜嚴清同冰潔司戎幕府作守敷陽蝗歸河朔珥陳
倉大夫濟濟士寔鏘鏘文龜玉印紫綬金章首僚驥足
曜此龍光必齊之姜必宋之子儼德高門家榮桃李行
滿婦箴聲揚女史春秋代序春非昔春閱人成世世不
常人精華已矣空想芳塵疇日怛逝時屬屯窮蒿里尚
隔黃泉未通孝于惟孝追遠追終卜茲宅穴此幽宮
山浮苦霧樹動悲風流水噎水上月澹空悠悠自古冥
冥皆塵

嘉慶己卯四月偃師段嘉謨訪出此碑於武功之南鄉移至縣署大堂南海吳榮光觀并記

銘云孝于惟孝論語書云孝乎惟孝友于兄弟漢石經及皇侃本孝乎皆作孝于此銘亦用古本可見乎字改在隋後矣又云樹勲悲風勲當作動又云冥冥皆塵與上東韻不叶塵當是同字之譌

古誌
石華

右周鞏貞墓誌銘首尾共三十一行行三十二字字徑五分志敘貞之曾祖澄後涼召拜中書侍郎建威將軍玉門太守屬涼王無諱擁戶北遷士女波流生民塗炭乃與燉煌公李保立義歸誠魏太武皇帝深加禮辟云云以魏書攷之沮渠蒙遜據張掖魏世祖

神龜四年拜爲涼王蒙遜死子牧健魏書作爲魏所

滅策拜其弟酒泉太守無諱爲征西大將軍涼州牧

酒泉王後遣鎮南將軍奚眷討之無諱奔走遂渡流

沙士卒渴死大半無諱後據鄯善又并高昌病死魏書

謂無遺陳南曰李保者後梁李嵩之孫後梁爲沮渠

蒙遜所滅保奔伊吾臣於蠕蠕後無諱遁走保南歸

燉煌復先業奉表歸魏世祖授保使持節侍中都督

西垂諸軍事征西大將軍開府儀同三司領護西戎

校尉沙州牧燉煌公李保史有傳保傳作寶志又敘

寶永安二年隴西王尔朱天光入關者攷史傳尔朱

天光乃尔朱榮從祖兄子万俟醜奴僭號魏除天光

雍州刺史以討醜奴破擒之關中平莊帝進爵爲廣
宗王尔朱榮死尔朱世隆等推太原太守行并州事
元圖爲主乃以天光爲隴西王皆與史合惟本紀載
天光討醜奴平關中事於永安三年此作二年爲異
碑又有周太祖龕定關河公則功參草創沙苑苦戰
勲冠三軍云云攷周書本紀魏大統三年周太祖錄
尚書事引軍入關齊神武率衆渡河太祖造浮橋於
渭南冬十月壬辰至沙苑齊神武引軍來會遂進軍
合戰大破之斬六千餘級降二萬餘人齊神武夜遁
追至河上復大克虜其卒七萬留甲士二萬餘悉縱
歸收其輜重兵甲獻俘長安即碑云沙苑苦戰之事

也碑敘賔厯官岐州陳倉令除敷州中部郡守司土
上士下大夫授驃騎將軍右光祿大夫任豫州長史
別駕攷司土上士之名不見於魏書官氏志而隋書
百官志載周太祖所改官制及周書盧革傳亦止有
上士中士下士之目皆不詳司土上士賴此刻傳之
賔與澄兩世俱爲顯官而史皆無傳且據志謂賔沙
苑苦戰勲冠三軍而史亦無一語及之又賔之子志
與圍仕隋一爲營州總管司馬武陽男一爲右勲衛
大都督上洪男隋史亦皆無其人史之漏畧固不少
亦人之顯晦有幸有不幸耶此志文辭楚楚可觀字
亦不甚俗且首尾完善銘詞孝于惟孝句本論語書

云孝乎惟孝友于兄弟也孝乎之乎漢石經及皇侃義疏陸德明釋文俱作于義疏曰于於也惟孝謂惟令盡於孝也又集解包咸曰孝乎惟孝美大孝之詞此銘乎作于又以惟孝斷句與潘岳閒居賦同足徵隋人此文于尚未作乎亦以惟孝斷句矣惠徵君棟謂後儒据晉世所出君陳篇改孝于爲乎以爲孝屬下句恐未盡然据此文乎作于疑今論語注作乎亦後人所改又攷漢書王莽傳皆曰安友于兄弟亦是漢人以惟孝爲句讀之一證閻氏尚書古文疏證云案虞山錢尚書家藏圖熙九經本點斷句讀號稱精審亦以孝乎四字爲句先是張耒淮陽郡黃氏友于

泉銘曰孝乎惟孝友于兄弟張齊賢承真宗命撰弟
子贊曰孝乎惟孝曾子稱焉太平御覽引論語曰孝
乎惟孝友于兄弟唐王利貞幽州石浮圖頌曰孝乎
惟孝忠爲令德梁元帝劉孝綽墓誌銘曰孝乎惟孝
與武陵王書曰友于兄弟則知改從君陳篇讀者自
朱子始書益稷懋遷有無化居懋遷尚書大傳作貿
遷此文有懼此貿遷之語攷三蒼及小爾雅後漢書
章懷注並云貿易也易與變同義蓋以貿遷爲變遷
也說文寶古文瑤而廣韻玉篇直作瑤又保與寶通
易繫詞聖人之大寶曰位孟喜本作保史記周本紀
展九鼎保玉集解引徐廣曰保一作寶春秋左氏傳

盜竊寶玉大弓公羊傳作保保古文保字保俘形近
故春秋莊公六年齊人來歸衛寶寶誤爲俘此志文
稱李寶作保銘詞寶見陳倉作瑤亦皆與古合又龕
定關河之龕似借爲戡亂之戡魏齊造象記龕主有
作堪主者堪與戡皆從甚得聲故戡堪皆可與龕通
借惟樹勲悲風之勲當爲動而多四點作勲則聲義
俱別未見有通用者其揖作搢惠作憊苑作苑瘞作
瘞纏作纏攀作攀箴作箴皆當時別體字古泉山館金石文編
按志韋賓曾祖澄始仕北涼及沮渠無諱北遷乃
與燉煌公李保歸誠於魏李保史皆作李寶魏書
李寶傳世祖討沮渠無諱於燉煌寶遣弟懷達奉

表歸誠授使持節侍中都督西垂諸軍事鎮西大將軍開府儀同三司領護西戎校尉沙州牧燉煌公通鑑元嘉十九年四月沮渠無諱將萬餘家奔燉煌西就其弟安周據鄯善其士卒經流沙渴死大半李寶自伊吾入據燉煌繕脩城府安集故民九月無諱據高昌李寶奉表平城魏以寶都督西垂軍事云云誌稱涼王無諱擁戶北遷生民塗炭燉煌公李保立義歸誠與史悉合惟聲澄之名不見於史耳北魏孝莊永安二年爲梁武中大通元年是年六月魏以爾朱天光爲并肆等九州行臺仍行并州事天光至晉陽分部約勒所部皆安誌

稱從天光入關正指此也周太祖龕定關河沙苑
苦戰謂大統十六年宇文泰伐齊之役龕與戡同
楊子方言劉龕南陽是也沙苑即今同州之沙苑
周二年者明帝宇文毓二年爲陳武永定二年後
梁天定四年北齊天保九年時周末建年號次年
始號武成也周天和四年年五十有五則生於北
魏延昌四年爲梁武天監十四年永安二年入關
時年十五大統十七年年三十有七周二年年四
十有四保定二年年四十有八天和二年年五十
有三夫人陳氏以保定元年即世年四十五則生
於北魏熙平元年少公二歲自周天和四年至隋

開皇十五年凡越二十七年始得柩厝雍州始平縣即今西安府興平縣孝于惟孝本漢石經論語此石嘉慶中出土偃師段襄學嘉謨時宰乾州之武功購得之武功與興平接壤也

脩梵石室誌銘

石縱橫各一尺九寸十七行十七字正書在山東益都縣李氏

故比匠尼釋脩梵石室誌銘

并序

比匠尼諱脩梵俗姓張氏清河東武城人瀛州刺史烈女第三女幼而爽晤規範閑明有同縣崔居士南青使君出第五子以德義故歸焉未幾偕老而君子先逝遂改菩提心出家入道不意法水常流劫火將滅自開皇

十三季八月廿三日终于俗宅春秋九十有一十五季
十月廿四日窆于石室兄弟相撫貫截肝心烏烏里心
終天莫報先王制禮抑不敢過馮翊吉子才高學博請
挾其詞式昭國壤

留城祔主趙都建國代胥詰人門多通德王祖王父胥
文胥則駐馬期童褰裙述職載旌澍質天資柔惠梁婦
萍榮葉妻避世心遊心覺行依真諦超彼豚津非茲善
誓電多急影范是虛緣形歸掩石神住開蓮春鶯朝喚
秋螢夜燃使令瑪泣匍匐空山

張烈魏書有傳字徽仙其先清河東武城人徙居齊
郡之臨淄封清河縣子後爲瀛州刺史又青州崔氏

有僧淵者

魏書附崔元伯傳北史避唐諱作僧深

曾爲南青州刺史有

六子其第五子名祖螭

普泰初與張僧皓謀叛誅脩

梵終於開皇十三年年九十一是生於梁天監二年

祖螭誅時年二十九歲其夫似即祖螭而誌諱言之

所謂南青使君指僧淵也

山左金石志

誌書瀛作瀛爽作爽馮作馮載作載又德彼徒三字

皆作人旁褰褶當是褰檐皆別體也

筠清館金石記

右石室志十七行行十七字正書字徑七八分在山

東益都縣志序尼諱脩梵俗姓張氏爲瀛州刺史烈

之女歸崔居士爲南青使君之第五子因先逝乃出

家入道後云終於俗宅窆於石室兄弟相撫貫截肝

心烏鳥之心終天莫報先王制禮抑不敢過後銘詞云徒令孺泣匍匐空山則脩梵之爲尼乃在家奉道並非削髮空門者其所謂兄弟蓋謂其所生之子也石室者即塔也不言塔而言石室者亦因其終於俗宅也又云馮翊吉子才高學博請挾其詞則此文爲吉子所作而不言其名脩梵爲瀛州刺史張烈第三女攷烈後魏書有傳云字徽仙清河東武城人高祖賜名爲字焉曾祖恂隨慕容德南渡因居齊郡之臨淄少孤貧涉獵經史有氣槩時青州有崔徽伯房徽叔與烈並有令譽時人號曰三徽歷官至安北將軍瀛州刺史爲政清靜吏民安之更滿還朝因辭老還

鄉里兄弟同居怡怡然爲親類所慕元象元年卒於家時年七十七先爲家誠千餘言並自敘志行及所歷之官臨終敕子姪不聽求贈但勒家誠立碣而已有二子又攷唐書宰相世系表謂清河東武城張氏出漢留侯之裔故此銘詞有留城祚土趙郡建國之句其言同縣崔居士南青使君第五子者當是崔僧淵也後魏書崔元伯傳亦云清河東武城人其族有目連子僧祐弟僧淵仕至龍驤將軍南青州刺史有傳故此稱南青使君傳言僧淵元妻房氏生二子伯麟伯驥後房氏更納平原杜氏僧淵之徒也與杜俱去生四子伯鳳祖龍祖螭祖虬得還之後棄絕房氏

遂與杜氏及四子家於青州又云祖螭粗武有氣力
方刺史元羅板爲兼統軍討海賊普泰初與張僧皓
俱反圍青州尔朱仲遠遣將討平之傳首京師又云
祖虬少而好學下帷誦書不驅競當世舉秀才不就
此稱南青使君第五子以傳之次敘言之當爲祖螭
然墓志既云崔居士乃無官爵之稱又云妙德義故
歸焉似指第六子祖虬言之方近是豈祖虬爲兄祖
螭爲弟而傳誤倒其次敘耶唐宰相世系表於清河
青州房列目連子但有僧淵而無僧祐并脫失僧淵
諸子之名亦無可攷其先後且據志有兄弟相撫等
語則崔使君且不止一子而于史表亦皆闕畧無可

考據表僧淵當爲前開府參軍事崔頌之曾祖此志云終於俗宅葬於石室必是仍窆崔氏墓地碑以國爲國已前見敬脩羅碑褰褱述職之褱當即褱之繆體字也後讀山左金石志引段赤亭語謂其夫似即祖螭而志諱言之恐非是又誤妙德義之妙爲以霆多急影之霆爲電

古泉山館金石文編

按脩梵張氏歸於崔夫亡出家釋名脩梵隋文帝開皇十三年春秋九十一則生於梁武帝天監十二年也窆諸石室而銘之從釋氏法也兄弟相撫謂子之兄弟也故曰烏烏之心終天莫報既從異端猶引先王之制亦無於禮者之禮矣清河東武

城今東昌府武城縣漢置東武城縣隋改曰清河
瀛州今河間府獻縣後魏立瀛州張烈魏書有傳
序曰馮翊吉子才高學博昔人撰詞每多退讓未
有自詡如此者意銘爲吉子所撰而序吉子之銘
者別爲一人惜不可攷姓纂馮翊吉氏漢同州刺
史吉瞻吉子殆其後歟山左金石志南青使君
爲崔僧淵第五子名祖螭平津讀碑記以魏書崔
僧淵傳祖螭傳證之與此崔居士不合所謂南青
使君者或別有一人

胙土作祚用古字古誌石華載此文載旌淑質

作載挺淑質

陸增祥志

岐州舍利塔下銘

石高一尺三寸五分廣一尺四寸五分十二行行十一字在陝西扶風縣

維大隋仁壽元年歲次辛酉十月辛亥朔十五日乙丑
皇帝普爲一切法界幽顯生靈謹於岐州岐山縣鳳泉
寺奉安

舍利敬造靈塔願

太祖武元皇帝元明皇太后

皇帝皇后皇太子諸王子孫等并內外群官爰及民庶
六道三塗人非人等生生世世值佛聞法永離苦曰同
升妙果

舍利塔下銘

按隋書文帝紀仁壽元年六月詔省國子學惟留

學生七十人太學四門及州縣學並廢其日頒舍利於諸州唐沙門道宣廣宏明集載仁壽元年六月十三日立舍利塔詔分道送舍利往諸州起塔限十月十五日午時同下石函隋賀德仁首山舍利塔碑亦云分布舍利於八十州同時造塔萃編所錄有三一爲青州逢山縣勝福寺一爲同州武鄉縣大興國寺並八分書其文及年月日並與此同末云永離苦空同升妙果苦曰作苦空小異此銘同口妙果缺一字即升字也又有鄧州大興國寺舍利塔下銘則仁壽二年建文亦與此不同隋地理志雍州扶風郡大業初置舊爲岐州統縣岐

山後周二龍縣開皇十六年改名唐初析岐山置
漳川縣後改扶風故此石在扶風也嘉慶初何兵
備承薰宰此置石寺壁拓本因以流傳故布政盛
孟巖惇崇故爰周筇雲爲漢皆演治識跋今俱不
可得矣

栖巖道場舍利塔碑

高七尺五寸廣三尺五寸三十五
行行七十字正書在山西蒲州府

大隋河東郡首山栖巖道場舍利塔之碑

司農書佐會稽賀德仁奉教撰

蓋聞在天成象玉衡齊於七政在地成形金簡開於四
瀆大造區夏罔濟黎元功格二儀事絕三界豈若鷲山

寂寂神智所以經行龍華嚴淨靈覺所以宴坐青蓮耀
彩普明非想之外白豪發輝遍照無色之表然則重華
文命德冠百王迦牟尼多道超千佛真俗冥感機理因
應護持世界汲引群生咸悟苦空皆臻常樂既而抱尸
宵眇久滅度於閻浮翅末盤桓尚凝神於兜率去聖滋
遠思聖滋深慧炬韜光慈燈掩色三途黑暗溲沒煩惱
之河六趣昏迷沉淪愛欲之海津梁靡託彼岸奚憑貝
多傳于半偈栴檀寫于滿月馬鳴繼其絕紐龍樹緝其
頹綱重蔭濃雲更垂甘露化方東漸道向南流星精辯
於劫灰日光通於神夢尔乃像教鬱興支提競起大乘
妙典踰天山而遠度高行名僧望帝京而遙集栖巖道

塲者魏永熙之季

大隋太祖武元皇帝之所建立于時得一未清初九勿
用褰帷補板乃扞祗園基趾首陽夷齊秉節之地登臨
媯汭娥英降嬪之所加以接連關陝密迤於榆候柱史
之園風仰春陵之佳氣南望華嶽峩峩高掌北眺龍門
茫茫遠跡西抵秦渭鶻首撫其分野東拒驛汭馬煩通
其疏導斯寔山川之爽塏華夏之壯麗者歟於是審曲
面勢占星揆日懸水置墊䟽山抗殿蓮峯翠微映花臺
而秀峙松磴森聳對香閣而交廡瀟侶凝粹梵音清遠
還如鹿野之間更似魚山之側何則時有否泰道或汗
隆周氏季末惡章版蕩毀灋甚於坑焚銷像深於炮烙

三川並震預覩橫流之徵九鼎俱沉先見群飛之兆敷
憂啓聖天祚明德烟雲變彩鐘石草音詰誓起於鳴條
謳歌歸于景亳

高祖文皇帝撥亂反正膺錄受圖作樂制禮移風易俗
懸玉鏡而臨寓內轉金輪而御天下監周室之顛覆拯
釋門之塗炭爰發綸言興復像瀍渥澤雷震渙汗風行
圓光炳於奇特方等開於秘藏神僊慶率幢蓋浮空八
正歡娛幡繒溢陌遐迤提福幽明響應天不愛道地必
程祥膏露飄零醴泉騰涌史豈絕書府無虛月斯乃太
平之嘉瑞方符出丑之休徵至於佛入涅槃遺形舍利
八國應供六度所冀邁優曇之希有甚河清之罕值

聖朝德教弘道威形護澤超踰僂豫冠絕波斯因化冥
通精靈顯出爰自丹青之頂灑于紫庭之上若飄冬霰
似雨天花三事大夫抗表儼蹈七神佐命安歌踊躍粵
以仁壽元年歲次辛酉爰興 睿想乃發盟誥今布舍
利於八十州剋十月十五日同時造塔 詔旨以斯福
地 太祖善基櫟陽宮寢永絕愛敬畢陌園陵空經哀
感嚴飾淨土冥資 清廟乃命有司於此建塔使星炳
於天漢靈宇構於巖阿邦君與邑宰交馳緇衣與黃冠
競集百工咸事庶民子來以九月廿日規模量立之所
忽聞鐘鼓之聲至十月十一日將入金函影若香爐凌
空而上繞浮圖寶瓶復起紫焰皆作蓮華還成佛像到

十四日夜光出塔上流照山頂時如貝闕乍似銀臺傾
城縱觀連鑣接軫歌舞咸作笙鏞並奏照爛掩于星辰
砒鏘振於陵谷爭投鏐銑競捨琨瑤疑覲海藏之玕若
翫河宗之寶俄而日宮圓敞月相澄明神女塗香天人
獻石珠璣璀璨丹青彪炳剝鳳凌霄共陽鳥而矯翼燭
龍耀影與陰兔而爭輝似多寶之涌出等育王之靈化
放光動于瀛界神功遍于剝土豈如秦王慕道虛架橫
海之橋漢帝尋真徒設通天之觀初

高祖炳靈曩曜載誕馮翊渚浮虹氣室照神光忽有天
女飄然來降現尼形像自号智儂容儀姝妙音詞清雅
攀跂沐浴摩頂讚嘆謂元明太后曰此子天挺睿哲

相貌端嚴方當平一區寓光隆佛教宜簡擇保姆之才
鞠養於清淨之室言畢不見莫知所之及雄圖蓋在遂
興王業神母記別信而有徵洎將昇鼎湖言違震旦垂
拱紫極遺愛蒼生乃召匠人鑄等身像并圖儼尼置于
帝側是用紹隆三寶頒諸四方欲令率土之上皆瞻
日角普天之下咸識龍顏以仁壽四季歲在甲子發自
鎬京降臨河曲風伯前驅雨師清道紺馬逐日玉女焚
香若昇忉利之宮如上須弥之座尋而洮頰大漸厭在
登遐故知聖智見機冥兆先覺昔者灋王將逝化佛遍
於花臺金棺既掩見影留於石室以茲方古異在相符
皇上欽明續歷重光紹祚道洽百神智周萬物定鼎卜

垂永固洪基測主建都乃均職貢巡遊河洛式導宮扈
之儀登降云亭方具介匠之禮垂旒淵默負宸兢莊高
詠薰風光顯慧日弘宣二祖之業揔持三乘之教配
天配帝盡孝敬於郊禋依佛依經乃莊嚴於塔廟巍巍
乎其有成功也蕩蕩平民無能名焉若夫拓路四通寔
資演說伽藍崇建乃發至誠寫器傳燈抑允多聞之藏
聚沙布金方求無上之道太祖爰初締搆深屬綱維
高選名德爲其軌範時有僧融灤師明達禪師智刃鋒
穎戒珠圓潔律儀動衆梵行普聞慕雪嶺之投身企香
城之灑血夙興夜寐輟寢忘餐親執縮版躬營塗墍梓
匠遵其規臆繪事冀其雕鏤勞倭身心亟移灰琯雖祗

隨之樓門地迦葉之搥塔泥校以精勤曾何等級是故
禪龕義窟敷息薰心冬室夏堂避暑清暑五時敷演四
事豐盈振錫爭趨持瓶揔華飛流穴石澄八解之水驚
飄動樹吐七覺之花乃類歡喜之園圍殊安養之國況
復蒲城異區寔惟形勝冠蓋雲合車馬川流聽瀛之侶
如林獻供之徒成市登彼靈山似遊崑閩臨斯德水若
映熙運豁尔發矇俄然悟道上震有頂梵帝敞於天宮
下救無間魔王開於地獄江海爲量何以測其淺深草
木爲籌不足知其邊際河東太守正議大夫陳公竇慶
武元皇帝之外孫上柱國陳懿公之中子枝連若木
流派天潢作土承家今珪方岳西都外戚之重東京元

舅之貴公侯之圖必復山河之誓無泯寄隆藩屏任屬
股肱比屋被其春風運城仰其冬日聽訟舍棠歸依道
樹宜條駟傳圖仰濃輪口主簿徐敏恭司功韓仁迪司
戶姬君觀司倉鄭希玄司濃韋修已等弼諧求瘼匡贊
共治連璧擅其清風懸榻馳其美譽經始淨業迴向瀛
門昔大夫吉甫尚箸雅什長者寶積猶陳妙偈長守四
道式樹豐碑爰命末僚乃作頌曰

緬尋圖緯歷選皇王補天立極括地開壇導德齊禮正
位辯方圉祛有漏孰悟無常如來應跡誕生迦衛乘月
降神寶星興在太極五濁闡揚四諦斷絕蓋纏薰修福
慧 太祖歷試建旗作牧玉淵潛龍朱軒馴鹿陟彼陵

昇旆茲川谷乃立精舍方興版築靈岳鬱盤王城聳峙
通眺少室遙臨太史京都襟帶山河表裏鷄嶺可模鶴
林斯擬周德云季鼎祚方移崇信調達欽尚流離湮毀
金地枯涸寶池民號鬼哭川竭巖隳赫矣高祖勃焉
革命就日合明則天齊聖中興王道深入瀛性調御渾
和汲引樂淨佛身舍利帝儀靈爽八彩光華五色炫
晃合寶爲塔鎔金成像十方迴向兆民瞻仰上聖承
圖下武繼文鳳翔江漢龍飛滄泠□籠姬項孕育唐勛
流布瀼雨輝映慈雲柰苑洞開菴園□敞風和寶鐸露
光僊掌道界金繩庭懸珠網谷虛磬徹巖幽梵響猗歟
開士□闡圖宗美哉邦守翼讚時雍言遵衛鼎□□□

口式刊圖石永樹高峯

按賀德仁撰河東郡首山棲巖道場舍利塔碑不

題年月孫兵備

星衍

訪碑錄作仁壽二年乃沿金

石錄之誤碑載隋高祖鑄等身像圖仙尼於帝側
以仁壽四年甲子歲降臨河曲下云皇上重光紹
祚宣二祖業則建碑歲月當繫之大業初年也碑
題河東首山又云褰帷蒲坂登臨媯汭接連關陝
密邇汾榆南望華岳北眺龍門西抵秦渭東拒晉
汾四境秩然爲今蒲州府而訪碑錄謂在河南閩
鄉亦誤隋書地理志河東郡後周曰蒲州統縣河
東舊曰蒲坂縣置河東郡開皇初郡廢十六年析

置河東縣大業初置河東郡并蒲坂入有首山媯
汭水並與碑合河東郡為大業初復置則仁壽二
年無此郡也漢書武帝紀元封六年春作首山宮
三月幸河東文穎曰首山在河東蒲坂界水經注
雷首山臨大河北去蒲坂三十里一名獨頭山夷
齊所隱河東首山即雷首山非孟津以南之首陽
山也淮南子墜形訓高誘注首山在蒲坂縣南河
曲之中夷齊所隱高祖因農華陰人生於馮翊故
云密邇粉榆隋書帝紀高祖文皇帝西魏大統七
年生於馮翊般若寺有尼來自河東謂皇妣曰此
兒所從來甚異不可於俗間處之尼將高祖舍於

別館躬自撫養皇妣嘗抱高祖忽見頭上角出徧
體鱗起大駭墮高祖於地尼自外人見曰已驚我
兒致令晚得天下周大定元年高祖受禪開皇元
年追尊皇考隋國公為武元皇帝廟號太祖皇妣
呂氏為元明皇后又咸通臨安志及靈應寺舊志
有云神尼舍利塔在錢唐飛來峰頂隋文帝生於
同州般若寺寺尼志仙謂太祖曰此兒佛所祐太
祖委尼視育帝長尼私謂曰佛法暫廢賴汝而興
屬周廢教尼隱帝家而卒仁壽二年遣僧齎神尼
所囑舍利於此造塔碑云尼號智僊臨安志作志
仙志智音近而訛隋紀尼來自河東宋志同州般

若寺尼後卒於帝家此碑則云現形讚嘆言畢不見較諸史志更為神異周建德三年廢佛道教大象二年隋文帝為大丞相復佛道教即碑所云毀灋銷象及興復象灋也陳懿公竇榮定也隋書本傳榮定扶風平陵人妻高祖姊安成長公主以佐命功拜上柱國寧州刺史進爵安豐郡公拜武衛大將軍贈冀州刺史陳國公諡曰懿子抗嗣漢王諒搆逆煬帝以抗為通謀除名弟慶襲封陳公官至河東太守衛尉卿弟璡扶風太守故云武元外孫懿公中子唐書文藝傳賀德仁越州山陰人與從兄德基以文辭稱人為語曰學行可師賀德基

文質彬彬賀德仁入隋授豫章王記室徙封齊復
為府屬王廢德仁以忠謹獲賞補河東司法參軍
高祖時與蕭德言陳子良皆為東宮學士此碑德
仁及徐敏恭以下皆河東官屬故云末僚作頌歸
美陳公兼及同列也碑字筆法縝密高渾書者不
傳史稱寶慶兄弟並工草隸金石錄唐司空寶抗
墓志歐陽詢撰并書隋衛尉卿寶慶墓志不著名
氏小楷工妙不減歐虞是碑為慶所勒石尤必妙
選撰書能手也

白毫作豪用古字蒲阪作扳炮烙作格舞蹈作
儻皆假借

陸增祥志

王摩侯舍利塔記

縱橫六寸中孔方三寸記刻左右及下方左右各二
行行九字十一字不等下方三行行二字三字不等
正書在陝西長
安縣百塔寺

大隋大業五年歲次己巳正月己巳朔廿日京兆郡大
興縣御肅鄉便子谷至相道場建立佛舍利塔 弟子
王摩侯供養

按隋至相道場亦名至相寺即唐百塔寺也在今
西安城南五十里隋為至相道場唐為信行禪師
塔院萬歲通天二年梁師亮墓志葬雍州城南終
南山至相寺梗梓谷信行禪師塔院之東唐時慕
信行者皆葬其左右而置塔焉大厯中建百塔寺

隋大興為唐萬年即今咸寧縣梗梓谷在豹林谷
東石鼈谷西玉海引呂大防城圖云唐城南直石
鼈谷長安志石鼈谷以谷水為長安萬年二縣分
界迄今不改自唐宋以來皆以梗梓谷隸長安據
此記則隋入大興境內矣長安志御宿川在萬年
縣西南四十里楊雄羽獵賦序武帝開上林東南
至御宿川漢元后傳夏遊籋宿師古曰籋宿苑在
長安城南今御宿川是也御宿鄉因川而名御宿
作御肅梗梓作便子音同而誤

正議大夫寧贇碑

高四尺六寸廣二尺八寸三十行行三十九字碑額
中穿穿左右題圖越郡欽江縣正議大夫之碑十二

字四行並正書
在廣東欽州

竊以太暉之末分顓臾之邦唐并之餘為管魯之國邵
公思室賦棠棣之詩幸有哀本悲被髮之異故枝流葉
後自結貞筠之條宗子維城各理封塋之邑故甯相甯
淪傅鼠玉之名甯喜甯戚紆遺芳之哲公匡衡在輔無
忘士鷲之工從而能政追蹤子范之用所以繁衍陵穆
盤根閩越者哉公諱贊字翔威興州臨瀟人也公惠好
自研齊赫嚮之德歲誠和誘同孟明之溫儒藻進賢常
吟雅頌肅嚴愛善宮壩之美祖逖馳千載仁風擁六奇
高辯警加木鐸訓悅過遲梁武皇帝除芝州刺史搃督
九州諸軍事陳宣武皇帝又除換安州刺史久猛力德

賈神皇氣衝牛斗典祀政事隋會無聞牛乘輜睦先穀
懷讓文皇帝除使持節開府儀同三司安州諸軍事安
州刺史宋壽縣開國侯兄長真包山岳之志搃雲霞之
襟行應管鍾義通泉涌褰帷本土剋舉家邦節盡中朝
風純面海帝授上儀同三司欽州刺史立功於國勅加
官賞尋進上開府儀同三司欽江縣開國公食邑一千
戶軒車薄伐外馬車元又為行軍總管言提荷戟猶席
會之獨清勲入司門類武安之奉詔仍轉上大將軍其
年改右光祿大夫寧越郡太守爵名暴塞成似班超之
官職撫舊閭還若淮陰之封以昔方今盛哉而已公履
端器量增萬頃之測舍韜縱容踰四學之勛開皇十四

年帝以公衣冠子胤遠來八朝既秉誠心宜升戎秩授
大都督厚贈繒繒徧加享祀以公長榆之變李氏弱乎
區介細柳之搗條侯及存無策南之穴趾之川北靖蒼
梧之野仁壽二年詔公兄弟建國宣揚國化嗣位牧民
撫兼蕃部宜加榮秩用優恒典增上儀同三司到大業
二年帝以公驟從戎踐克著嘉庸拜上儀同三司餘官
如故公沉神惟帳竟羊祐之謀脩脩繕完規滅宣之度
披岳三略之精麾師九圍之勇雲梯再起與驪興維兄
及弟陳兵林邑推鋒振旅以先啓行前茅慮無中摧後
勁浮青雀以泛白波糧未馬以排綠浪軍軾相臨雲橫
百陣靡旄靡壘有許伯之雄折馘掉鞅摸攝封之勢故

得卧彼鼓旗投衡拔旆困獸猶鬪鋪舶新墉之江出綬
隨緣之海賊艦千乘公舟二十旭旦懺交浸霄未以公
策運在標擢以棲舡五鵠徧師撒隊得潰彼豺狼爭舟
指掬芟夷揅滅盡殪凶伎獻捷鏤地馬伏波慙色以頽
獲神納俘檀和之愧乎其道公巡厯三軍皆如挾纊聲
播百官咸仰斯茂大業二年十月馳謁承明躬親連關
乃受開府儀同三司即其年改為己儀大夫公刑儀班
越子張非其人容裒簪裾陸機失其侶柳蒲早烝風燭
易遽觀閔既多靈芝是乏德以大業四年歲口戊辰己
月十九日终于私宅春秋卅有五嗚呼哀哉樹絕大夫
之陰營息將軍之号市停三日悲盈口邦大息嗣赫于

終于始唯明唯孝大禁五年歸舊所密松連蓋踈楊迥
吟言念君子其銘云尔

火紀承宗相土師農生民厥始社稷根蹤鳳凰垂翼幽
都受封支傳帝業祠墓高龍棠陰理頌周□□礼令美
閔越德隆替邳仁鏡長明智花恒啓遊藝自依多能脩
體文著馬鞭行崇基堦義水悌□□泚々建國興邦
純守邊壘威流五嶺勇振三湘臨濤粉溢昭穆丘長惟
開策運樓移勢章梯衝雲□□銜月光旗影飛地劒抱
星芒烽連柳塞陣合魚陽舟移鷁轉權動蘭芳董蒲葉
盡秦糜顓張朝稱□□野号賢良卿士唯相參輿是匡
搖落裴斐原隰孤平似蓋樹委如樓鼓橫悲懷鯀谷哀

慘松聲□□□從終傳令傳名 大槩五年四月□□

□□

按隋正議大夫寧質碑銘凡一千一百三十四字
魚驪興句與上原脫一字銘末句終傳令名令下
衍一傳字碑下左方石損共闕十三字年月下闕
二三字餘皆完整道光十二年廣東高廉道仁和
許公乃清得於所屬之欽州寄示拓本碑為南刻
書則北宗猶存漢碑之式粵東石墨此最晚出實
為最先翁氏阮氏金石略皆未載補而冠之可為
後來居上矣世本寧氏出自衛武公子季亶食采
於寧因以為氏春秋成二年傳杜注寧相寧俞子

襄二十五年傳九世之卿族杜注寗氏出衛武公
至喜九世元和姓纂李璽弟頃生跪跪孫速速生
俞俞生殖殖生喜九世卿族齊有寗戚此碑以相
俞為昆玉而先相世次棼矣寗戚寗喜時地不同
且喜罪昭然何遺芳之有約舉諸寗而錯序之不
可為典要也寗贊之名正史未見贊父猛力見令
狐熙傳兄長真見劉方傳南蠻林邑傳北史隋書
並同祖達梁定州刺史陳安州刺史元和姓纂梁
受州刺史寗達居欽州達與達形似而譌梁定州
隋鬱州鬱林郡安州隋欽州寗越郡受州隋九真
郡地皆相近達在梁時刺定州亦刺受州姓纂之

甯達卽此碑之甯遠也隋書令狐熙傳開皇中上以嶺南夷越數為反亂徵拜桂州總管十七州諸軍事刺史以下官得承制補授熙至部大宏恩信時有甯猛力與陳後主同日生自言貌有貴相在陳日已據南海平陳後高祖因而撫之卽拜安州刺史驕倨恃其險阻未嘗參謁熙手書諭之申以交友之分其母有疾遣以藥物猛力感之詣府請謁不敢為非熙以州縣多有同名者奏改安州為欽州欽州改於開皇中猛力正刺其地姓繁以為梁甯達居欽州者因其後昆而追繫之梁無欽州也劉方傳授驩州道行軍總管經畧林邑方遣欽

州刺史甯長真驩州刺史李暈上開府秦雄以步

騎出越常方親率舟師趣北景

北史作煥

大業元年正

月軍至海口林邑王梵志遣兵守險方擊走之次

閩黎江既度賊乘巨象四面而至方射象象中瘡

却蹂其陣王師力戰俘馘萬計濟區粟度

北史作區栗

進至大緣江賊據柵又破之逕馬援銅柱南行八

日至其國都梵志棄城奔海獲其廟主金人汗其

宮室刻石紀功而還南蠻林邑傳林邑之先因漢

末交趾徵側之亂區連殺縣令白號為王無子甥

范熊代立熊子逸無子曰南人范文自立其後范

佛宋交州刺史檀和之將兵擊之深入其境

南史宗憲傳

至梁陳亦通使往來高祖平陳乃獻方物

後朝貢遂絕羣臣言林邑多奇寶仁壽末遣大將

軍劉方為驩州道行軍總管率欽州刺史甯長真

擊之其王梵志率徒乘巨象而戰方多掘小坑葦

覆其上挑戰偽北梵志逐之至坑而陷縱擊大破

之棄城而走方入其都獲其廟主十八枚

隋書誤作枚今

從北史作枚

皆鑄金為之蓋其有國十八葉矣碑稱猛

力長真勲伐並與史合林邑之役贊在行間足補

李魏二史所未備碑引馬伏波檀和之皆征蠻前

事經畧林邑劉方傳詳水戰南蠻傳詳陸戰碑則

約而兼之其云獻捷鑄地獲神納俘即史所稱獲

其廟主刻石紀功也隋地理志寧越郡梁置安州
開皇十八年改曰欽州統縣六欽江舊置宋壽郡
平陳郡廢開皇十八年改曰欽江大業初置寧越
郡又百官志正議大夫與開府儀同三司舊秩皆
四品煬帝即位多所改革以開府儀同三司為從
一品同漢魏之制贊受散職四品故改為正議大
夫則知開府儀同為從一品乃改於大業二年史
與碑可互證贊說文分別也從虓對爭貝讀若迴
胡畎切虓虎怒也五閑切贊字許徐異音蓋古从
貝聲今从虓聲耳爾雅釋獸贊有力贊為獸名文
選魏都賦蒹葭贊則兼怒生爭別之義翔威命名

取諸雅訓固有父風者矣碑文竊作竊邦作邦棣
作棣哀作哀塏作塏溜作溜牆作墪父作父輯作
輯淵作淵翰作翰備作備旅作旅寇作寇宵作宵
撲作撲仰作仰邊作邊靈作靈條作條陞作陞邊
作邊並沿南北朝別體太皞作太皞皐字通魚
麗作魚驪折馘作折馘柳蒲董蒲皆作蒲秦麋作
秦麋乃偏旁借羊祐作羊祐誤晉書祐本傳荊州
人為祐諱名屋室皆以門為稱改戶曹為辭曹祐
名从示古聲故書多有誤為祐者不得引碑為證
也

從容作縱容芬作粉皆別體叔向作嚮緬海作

面理訟作頌尚合於六書通段之義前跋未及

陸增祥志

太僕卿元公墓誌

石縱橫二尺五寸三十七行行三十七字正書在陝西咸陽縣出土今藏予家

大隋故朝請大夫夷陵郡太守大僕卿元公之墓誌銘

君諱字智河南洛陽人魏昭成皇帝之後也軒丘

鞏其得姓卜洛啓其興王道盛中原業光四表其後國

華民譽瓊萼瑤枝源派流分奮乎百世具諸史冊可略

言焉六班祖遵假節侍中撫軍大將軍尚書左僕射與

青兗豫徐州諸軍事與州牧常山王高祖素假節征西

大將軍內都大官常山康王曾祖忠使持節敵騎常侍

鎮西大將軍相太二州刺史侍中尚書左僕射城陽宣
王祖暉使持節鼓騎常侍都督徐州諸軍事平東將軍
徐州刺史宗正卿父冢使持節侍中驃騎大將軍開府
儀同三司尚書左僕射華敷南秦并幽晉六州諸軍事
六州刺史司徒公樂平慎王維君幼挺奇資早飛令譽
識鎮表於觀虎風流見於乘羊落落高標排青松而獨
聳亭亭峻節映綠竹而俱貞吐納美風規雍容善辭令
通人仰其好仁僚友稱其孝友於是聲譽流洽孟晉追
群周保定四季詔擢為左給事中士禁內清切玉事便
繁許史之親乃膺斯授金張之寵方降此榮陳力効官
獨高前代天和四季遷為給事上士貴遊子弟實符束

捐之緯名士俊才不憚荀綽之記望表准而高視顧蘇
林而載馳建德元季入為主寢上士粵自居中遷于內
寢自非不言如子夏至慎若嗣宗豈能泚慎於否臧無
言於溫木三年二月轉爲掌式中士君清循疾惡正色
讜言簪筆自肅於權豪霜簡不吐於強衛故已聲齊乳
虎号擬蒼鷹官得其人斯之謂矣五季四月以君姪正
幹職遷爲司御上士時三方鼎足務在并兼既物色賢
人且資須良馬五監三令未易其人宣政元季以軍功
封豫州之建寧縣男邑二百戶其年八月又錄晉陽之
佖加使持節儀同大將軍大象二年又仍舊封進爵爲
子擁茲絳節擬上將之儀苴以白茅開建國之社尋遷

少駕部下大夫管金日磾以謹養致肥武帝擢之中監
百里侯以時使不暴穆公授以上卿望古傳今於茲為
美開皇元年出為益州武康郡大守公導之以德齊之
以禮田餘滯穗路有遺金又進爵為伯轉儀同三司從
格例也秉彼躬珪輝煥五等服茲袞冕照映三台九年
授使持節扶州諸軍事扶州刺史十六年改授渝州諸
軍事渝州刺史公頻刺二州申威千里抑強而惠解寔
舉善而矜不能猾吏無所竄其情奸盜不能匿其跡
聖主纂承洪緒釐改刺州選任能官更授夷陵太守公
肇膺嘉舉彌勵清勤已恆暗居不官燭王閔獨坐不
發私書由是徵入為太僕卿朝請大夫如故時達遷令

式贊弓矢揔駒駉之監長統昆之令丞駟駿加銳於
軍容犧牲脩膄於崇望方當控茲八駿御彼六龍登
栢梁而賦詩出上林而奉鬯而晦明之疾既湊膏肓之
堅先侵大業九季扈從遼碣月日遭疾云亡薨于
懷遠之鎮春秋六十有四嗚呼哀哉廼以十一年太歲
乙亥八月辛酉月廿四日葬于大興縣鄉

里禮也維公器局䟽通神情秀上虚心以待物直已
以明義不吐不茹正色正言面刺有汲黯之風爭見
王陵之節既而出宰牧守入作卿士奸吏憚其撻伏朝
彥挹其能官重以知止知足維清維慎家餘海陵之粟
既自足於餘梁室傳夏后之璜差無乏於玆玩至於殮

錢月給必均之於下吏祿俸歲受皆散之於親知斯乃
公孫弘之高風晏平仲之清規矣仁乎不憖嗚呼惜哉
今龜筮協從房腸行掩式鑄石用作銘云

巖巖其趾浩浩其源極天比峻浴日同奔鳳生鳳穴龍
陟龍門煥爛珪璧郁馥蘭蓀

爰啓常山廼建王爵振振趾定韓韓跼執法南宮建
旗東岳袞黻委他蟬瑋珥灼

太僕瑤枝人之表儀六德孔脩百行無虧丘陵難越壙
屺莫窺仁爲己任清畏人知

執法主寢牧州典郡審審讜言洋洋淋問虎去雉馴風
和雨順政号庶平民稱惠訓

靈旗東指巡海稜威秉轡作僕方効乘機忽悲撤瑟俄驚復綏龜謀空覬魚躍虛歸

飄飄反壑眇冥陽魄永愴君蒿長悲電窅蓋偃佷松鑪攢拱栢茂德洪名永宣金石

誌墓而闕其諱使後人無攷何也誌中聖主誤作聖士餘梁誤作餘梁君蒿誤作君蒿不口官燭統昆口之令長口爭見王陵之節每句空一字卒之月日及葬日甲子與所葬之鄉里皆空格不填蓋上石察書者無其人也房腸行掩用漢書霍光傳賜便房黃腸題湊各一具注便房壙中室也黃腸栢棺也謝惠連祭古冢文黃腸既毀便房已積此云房腸二者合言

也

古誌
石華

右墓志三十七行行三十七字正書字徑三四分行間有綦格書法勁秀刻畫峻拔乃石刻中之妙品也志言元公為魏昭成皇帝之後六世祖遵常山王高祖素常山康王曾祖忠城陽宣王並詳後魏書紀傳惟忠賜爵稱城陽公而非王與此志不同自當以此為正其言祖曷厯官至都督宗正卿父最終司徒公樂平慎王則皆不見於史忠傳言有十七子而止載其一子暉後周書元偉傳亦云忠之曾孫祖盛封城陽公父順封濮陽王皆與此不合蓋忠子眾多史家記載漏略者不少也此志空其諱一字又空其字上

一字而以其歷官周隋二史及唐書諸元氏傳攷之亦皆無所表見據志所署其上世後魏官爵惟內都大官不見於官氏志餘略同又按魏書地形志言相州天興二年置天平元年遷都改為司州而太與敷二州皆不見惟據隋書地理志上郡下云後魏置東秦州後改為北華州西魏改為敷州而太州亦未詳及又敘其在周自保定四年擢左給事中士天和四年遷給事上士建德元年入為主寢上士三年二月轉掌式中士五年四月遷司御上士宣政元年以軍功封豫州建寧縣男八月錄晉陽之役加使持節儀同大將軍大象二年又仍舊封進爵為子遷少駕部

下大夫攷後周官制僅附見隋書但言周太祖初據
關內官名未改魏號及方隅粗定改勅章程命尚書
令盧辯遠師周之建職置三公三孤六卿有內命外
命之別及上大夫中大夫下大夫上士中士下士又
言高祖又採後周之制所置有上大將軍大將軍儀
同三司等以酌勤勞如此志所云左給事中士主寢
掌式司御少駕部名目皆志所未詳也又攷本紀保
定三年九月詔柱國楊忠率騎一萬與突厥伐齊四
年春正月楊忠破齊長城至晉陽而還當即此志所
云晉陽之役蓋元公與有功焉其敘入隋所厯之官
則云開皇元年出為益州武康郡太守進爵為伯轉

儀同三司九_年授使持節扶州諸軍事扶州刺史十
六年改授渝州更授夷陵太守入為太僕卿朝請大
夫大業九年扈從遼碣遭疾薨於懷遠之鎮攷隋書
地理志但有雍涼豫兗冀青徐揚荆九州云煬帝并
省諸州旋改為郡此志所稱益州武康郡及扶州渝
州皆不列入攷魏書地形志有益州云正始中置者
並非其地此所謂益州武康郡者即蜀郡陽安也故
隋志於蜀郡下云舊置益州開皇初廢陽安下云西
魏置武康郡開皇初廢元公為益州武康郡太守在
開皇元年其時尚未廢也又同昌郡下云魏逐吐谷
渾置鄧州開皇七年改曰扶州又巴郡下梁置開皇

初改曰渝州按之墓志亦皆合其所謂扈從遼碣者
攷本紀大業九年三月幸遼東四月車駕度遼即其
事也隋志武陵靈郡懷遠下云後周置仍立懷遠而
開皇三年即廢則此稱懷遠正是其所卒之地縣名
也石刻於字名既有闕空又於其後不下官上及昆
下紫望上月日二字上皆空一字又廿四日下及鄉
上里上皆空二字又聖上之上誤刻作士彥式二字
俱有脫刻之筆元公卒於扈從中途月日或未得其
詳其鄉名里名亦或撰文時尚未定故空而未填至
名與字不當不知而亦皆空闕寔所難解且犧牲備
於紫望似紫上並無闕字不當空又日既為辛酉朔

則廿四日干支自當是甲申亦易知之者且夫人姬氏同葬另有墓志有之意者元公夫人姬氏既亡志又不言其子或竟乏嗣此志之撰刻皆他人為之經理故有此錯脫諸病歟然書寫刊刻之精實可愛可寶耳此刻及夫人姬氏二志石現藏毘陵陸氏聞其游幕關中見土人掘土得之遂購以歸

古泉山館金石文編

按魏書官氏志托跋氏改為元氏自云黃帝子昌意之後居北土為鮮卑君長昌意三十九代至昭成帝什翼犍始號代王都雲中道武改號魏即尊號孝文都洛改為元氏北史魏宗室傳昭成皇帝九子次五曰壽鳩常山王遵壽鳩之子道武初有

佐命勲賜爵略陽公及平中山拜尚書左僕射加
侍中領勃海之合口及博陵勃海盜起遵討平之
遷州牧封常山王天賜四年坐醉亂失禮賜死遵
子素太武初襲爵及平統萬拜假節征西大將軍
以鎮之復拜內都大官雅性方正居官五十載終
始如一時論賢之薨謚曰康陪葬金陵配饗廟庭
素子忠字仙德以忠謹聞孝文時累遷右僕射賜
爵城陽公加侍中鎮西將軍有翼贊之勤百寮咸
敬之太和四年卒謚曰宣忠子盛字始興襲爵盛
弟壽興宣武初為徐州刺史王顯為御史中尉奏
壽興怨謗朝廷賜死壽興自作墓銘曰洛陽男子

姓元名景有道無時其年不永及宣武崩顯尋被殺靈太后臨朝詔雪壽興贈豫州刺史謚曰莊壽興子景字幹從孝武入關封樂平王位侍中兼尚書左僕射加特進太僕先世遵素忠景墓誌與北史合魏書略同壽興即景李延壽撰北史避唐世祖諱改景為景故曰姓元名景魏收書多亡闕後人以北史補之故仍唐諱魏書稱忠十七子盛字始興景字壽興既諱景為景遂稱字為壽興也元和姓纂壽興少子景司徒樂平王生直直生文豪太僕少卿文豪生思齊鄭州刺史思哲舒州刺史思元右領軍思元生直南州刺史此志諱下空一

格字下僅著一字曰智樂平王生亶亶智義合太
僕諱宜即亶矣此與子孫名位皆可以姓纂補之
姓纂誤最為最魏書並不及最皆可以誌及北史
補正之誌無曷贈諡可以史補之城陽進王樂平
諡慎史皆未及又可以誌補之也太僕祖父歷官
封爵之地如冀青兗豫徐相華敷南秦并幽晉諸
州常山城陽樂平諸郡並見魏書地形志而不著
太州唐書地理志北都太原府太原郡本并州武
德三年以太谷祁置太州六年州廢二縣來屬元
和郡縣志隋改陽邑為太谷縣因縣西太谷為名
武德三年分并州之太谷祁二縣置太州六年省

太州復以二縣屬并州祁本漢舊縣武德三年改屬太州太州之名仿此是刻稱忠為相太二州刺史則元魏時已有太州唐初建置或沿元魏而史志失載歟隋大業九年癸酉春秋六十有四則生於西魏文帝大統十六年庚午是歲梁簡文大寶元年齊文宣天保元年至周高祖武帝保定四年甲申年十五擢左給事中士天和四年己丑年二十遷給事上士是歲周武封魏廣平公子元謙為韓國公以紹魏後建德元年壬辰年二十三入為主寢上士三年甲午年二十六轉掌式上士五年丙申年二十八遷司御上士三方鼎足務在并兼

謂陳齊也是年十月周伐齊取平陽十二月復伐

齊拔晉陽六年丁酉正月入鄴遂滅齊宣政北史作正

元年戊戌年二十九以軍功封建圉縣男邑二百

戶加使持節儀同大將軍所為錄晉陽之役也是

年六月武帝崩宣帝即位明年己亥二月傳位太

子闡是為靜帝改元大象大象二年庚子年三十

一進爵建圉縣子遷少駕部下大夫大定元年二

月遜位於隋隋高祖文帝開皇元年辛丑年三十

二出為益州武康郡太守隋地理志梁州蜀郡舊

改名并置武康郡開皇初郡廢據志則廢進爵為

伯散縣伯從封餞同三司正五九年己酉年四十

伯第三品

授使持節扶州諸軍事扶州刺史梁州同昌郡西

七年改曰扶州下十六年丙辰年四十七改授渝

州諸軍事渝州刺史梁州巴郡開煬帝大業三年

丁卯年五十有八四月改州為郡誌云聖上上石

士驤承洪緒釐改刺州更授夷陵太守荊州夷陵

守從第當在是年其入為太僕卿正四年不可定

朝請大夫正五如故者大業三年更定官制上柱

國以下為大夫廢伯子男爵時已改儀同三司為

朝請大夫故云如故封爵既廢故不題豫州建甯

縣伯也太僕寺統驛騶左右龍左右牝駝牛司羊

乘黃車府等署駟駿犧牲皆其所掌尚乘局有駒

駱閑駒駱監長即謂此也大業九年三月煬帝討
高麗四月度遼六月班師扈從遼碣薨於懷遠鎮
當即其時營州有懷遠守捉城即其地也隋雍州
京兆郡統縣二十二第一曰大興開皇三年置今
為西安府咸陽縣此與夫人姬氏誌石並於嘉慶
初出土石完整無一字剝蝕所空十二字乃本未
上石者文辭雅馴書法嚴饒北宗也而結體審正
一洗南北朝纖俗之習世重歐虞書此為先導矣
予得拓本珍玩數十年并二石購得之以嘉慶二
十三年夏載之江左藏於家

便繁即詩便蕃字蕃繁古通書庶艸蕃廡史記

宋微子世家作繁後漢書張衡傳亦用繁廡大
戴記爭鬪之獄繁矣漢書禮樂志作蕃左氏傳
封父之繁弱文選上林賦用作蕃弱注云蕃與
繁古字通准俗準字管子准壤險以為平呂覽
有准不以平五經文字引字林准平也皆即準
字表准即表準字孝尼陽夏人官給事中僕即
奚字孟子百里奚史記秦記作僕左氏傳祁奚
史記晉世家作僕巴祇漢書作祇嘗為揚州刺
史以清貧著名漢有兩王閔一為魏郡元城人
哀帝時為中常侍王莽篡位忌之出為東都太
守一為吳人建武初仕山陰令遷御史補陳留

太守不交權貴公庭閒寂人號王獨坐誌所用者蓋吳之王閔也此與姬氏兩誌兵燹後下方左角殘損不完矣君焄省文非誤字餘梁梁字下半米字惟右上一點稍涉曼患碑亦不誤黃氏均以為誤非聖士士字主之誤與上之誤無從肌斷陸增祥志

大僕卿元公夫人姬氏墓志

石縱橫二尺一寸二十七行行二十七字正書在陝西咸陽縣出土今藏于家

大隋故太僕卿夫人姬氏之誌

夫人姓姬

也圖開朱雀文德暢於三分瑞躍白魚

武功宣於五伐大封四十維城於是克昌長享七百本

枝以之蕃衍蟬連史策可略而言曾祖懿魏使持節驃
騎大將軍東郡公祖亮魏使持節大將軍開府儀同
三司燕州諸軍事燕州刺史東郡敬公父肇周使持節
侍中驃騎大將軍開府儀同三司光祿大夫東秦州諸
軍事東秦州刺史勲晉絳建四州諸軍事勲州總管神
水郡開國公夫人勿挺聰慧早標婉淋瑤資外照蕙
姓內芳既閑習於詩書且留連於筆研馬家高行終降
志於袁門曹氏洲姿且悅已於荀氏年十有八歸于元
氏焉太僕弱冠登朝盛播名德夫人亦愛恭內職憂在
進賢穆琴瑟之和展如賓之敬天和四年六月筭拜建
國夫人瑜狄委他光膺典策衡珮昭晰肅拜朝榮於

是輔佐以審官自防以典禮送迎未嘗逾閭保傅然後
下堂既而五福先虧六氣多爽青要素序奄搖落於禮
華玉露金風竟摧殘於蘭蕙建德六年六月九日遘疾
云亡時年廿有九嗚呼哀哉以今大業十一年太歲乙
亥八月辛酉朔廿四日甲申合葬于大興縣 鄉之
里禮也昔三春之俱秀獨掩翠而先訣今百年而
偕謝始同歸於共穴骸金鑲而長埋掩銅窓而永閉嗚
呼痛矣乃作銘云

帝馨肇祖君稷分枝上觀星象下相土宜葉隆在鎬仁
盛遷岐三讓至德九錫光施

驃騎誠烈早飛聲問擁茲絳節大啓東郡開府堂堂忘

情愜愜神水恂恂劬勞惠訓

有淑其德言容不迴星光東楚春芳標梅六珈照日百

兩驚雷鳳飛金帳龍翔玉臺

典箴纔臨瑟瑟方睦猶垂翠帳忽緯華屋輝旒旒挂巾

篋餘馥志沮且庄神傷晝哭

昔日體齊早別春閨今茲合塋還共塵泥雙鳥輓隻兩

劍終齊千秋萬歲永誌貞妻

夫人先太僕三十九年而卒至是始得合葬誌不言

其有無子息何也蕙性誤作蕙姓晝哭誤作晝哭夫

人如氏下二字所葬之鄉里亦闕而未填

古誌
石華

按姬氏東郡神水三世史皆無傳魏書北史並載

姬澹字世雅信義將軍樓煩侯以勇績著名桓帝
穆帝並見委任為羣情所附附見衛操列傳或即
東郡之先歟操傳北史仍魏書魏書多采晉光熙
中大邳城碑刻姬氏此志足補二史之遺隋地理
志絳郡稷山縣有後周勲州置總管後改絳州長
平郡舊曰建州後改澤州又延安臨真縣有西魏
神水郡後周郡廢周建德六年丁酉夫人年二十
九則生於西魏大統十五年己巳長太僕一歲是
歲梁武帝太清三年東魏孝靜帝武定七年也年
十八歸於元氏為周天和元年四年大僕遷給事
上士稱拜建國夫人時年二十有一兩誌皆不

及子姓猶見唐以前文律謹嚴自唐以後并諛生
者矣此書整逸端妙與太僕誌銘可稱雙璧

性姓同音假借未可遽以為誤金石文字中多
有之稱古文冊狄狄之誤珮珮之誤迴回之或
體馥馥之俗別巫葬之別體前跋皆所未及也
此石亦湮沒而復出殘損甚於太僕志先生藏
石尚有唐鄭溫球墓志兵燹後不可復得矣

志祥

金石續編卷第三終